

# Aðalfundur íþróttafélagsins Vestra fyrir árið 2019

haldinn þriðjudaginn 4. júní 2020 í Vallarhúsinu á Torfnesi og hófst hann kl. 20.00.

Á dagskrá fundarins voru hefðbundin aðalfundarstörf samkvæmt lögum félagsins.

## 1. Fundarsetning.

Hjalti Karlsson, formaður Vestra, setti fundinn og byrjaði á því að skýra frá því að fundardagsetningin væri sannarlega ekki í samræmi við lög félagsins, en samkomubann sem sett var á vegna Covid19 faraldursins sé ástæða þess hversu seint aðalfundurinn er haldinn þetta árið.

## 2. Kosning fundarstjóra og fundarritara.

Hjalti Karlsson, formaður Vestra, lagði til að Sólrún Geirsdóttir yrði kjörinn fundarstjóri. Samþykkt með lófataki. Sólrún tók við fundarstjórn og bar undir fundinn hvort gerð væri athugasemd við boðun fundarins en fundurinn var boðaður á heimasíðu Vestra: [www.vestri.is](http://www.vestri.is). Engin athugasemd var gerð, þannig að fundarstjóri úrskurðaði fundinn löglega boðaðan. Fundarstjóri bar fram tillögu um að Sigurður Hreinsson yrði kjörinn fundarritari og var það samþykkt.

## 3. Fundargerð síðasta aðalfundar lögð fram.

Sigurður Hreinsson benti fundarmönnum á að fundargerð síðast aðalfundar væri aðgengileg á heimasíðu Vestra. Engar athugasemdir gerðar við fundargerðina.

## 4. Formaður félagsins gerir grein fyrir starfsemi aðalstjórnar á liðnu starfsári:

### Inngangur

Fjórða starfsár íþróttafélagsins Vestra er nú runnið sitt skeið. Árið 2019 reyndist Vestrafólki nokkuð gott og var starfsemin í blóma. Á öðrum aðalfundi aðalstjórnar Vestra, þann 30. apríl 2019 voru eftirtaldir kosnir í aðalstjórn:

Til eins árs: Hjalti Karlsson, formaður

Tveggja ára: Guðfinna Hreiðarsdóttir, Sigurður Jón Hreinsson og Jóna Lind Karlsdóttir

Varam. eitt ár: Jónas Gunnlaugsson og Þorsteinn Þránínsson

Fyrir voru í stjórn Gísli Jón Hjaltason, Guðni Guðnason og Sólrún Geirsdóttir

Á fyrsta fundi nýrrar stjórnar þann 21. maí, skipti stjórn með sér verkum með sama hætti og árið 2018, þ.e. Guðfinna Hreiðarsdóttir var kjörinn varaformaður, Guðni Guðnason gjaldkeri og Sigurður Jón Hreinsson ritari. Aðalstjórn kom saman níu sinnum að aðalfundi þessum meðtöldum. Þann 26. nóvember var haldinn fundur með formönnum deilda og ráða og var þátttaka góð. Fundað var eftir þörfum og aðstæðum en tölvusamskipti einnig nýtt til starfsins. Í þessari starfsskýrslu verður einungis tæpt á nokkrum viðfangsefnum stjórnarinnar. Vísast að öðru leyti í fundargerðir aðalstjórnar á heimasíðu félagsins og starfsskýrslur deilda.

### Gróska

Eins og öllum er kunnugt tók til starfa ný deild á síðasta ári, reiðhjóladeild. Mikill kraftur var í starfsemi hennar og var haldinn metnaðarfull keppni hér á Ísafirði sem góður rómur var gerður að. Mikið starf hefur verið unnið í brautum til fjalla í nágrenni Ísafjarðar og er mikill hugur í reiðhjólafólki. Áhugamenn um klifur og lyftingar hafa verið í sambandi við aðalstjórn og sýnt því áhuga að stofna deildir innan vébanda Vestra. Jákvætt hefur verið tekið í þessa málaleitan og er nú boltinn hjá þessu áhugafólki sem þarf að semja sér reglugerð og kjósa stjórn. Að því loknu getur starfsemi hafist undir merkjum Vestra en aðeins innan s.k. almenningsdeildar fram að næsta aðalfundi. Þá fyrst er hægt að bera upp tillögu um formlega stofnun nýrrar deildar.

Rétt er einnig að geta þess að þær ánægjulegu fréttir hafa borist að næstkomandi tímabil mun meistaraflokkur kvenna í körfuknattleik verða starfræktur. Er það mikið fagnaðarefni að gróska undanfarinna ára í körfunni skuli nú skila þessum árangri, sem er að mínu viti mikilvægari en margan grunar.

### **Fjárhagur Vestra**

Allar deildir félagsins hafa haldið sína aðalfundi og birt ársreikninga. Samstæða Vestra velti á árinu 115 milljónum króna sem gríðarhá upphæð fyrir ekki stærra samfélag og má segja að rekstur Vestra í heild á árinu 2019, hafi gengið erfiðlega. Það er kunnara en frá þurfi að segja að það er mikið verk og erfitt, að afla íþróttafélögum fjár til rekstrar. Gríðarleg ferðalög og launakostnaður er þungur baggi og því þarf umhverfið að vera hagfellt til að endar nái saman.

Þriðja árið í röð er körfuknattleiksdeild rekin með tapi. Blakdeild var að þessu sinni röngu megin við núllið en knattspyrnudeild skilar góðum rekstrarafgangi líkt og í fyrra. Það er viðbúið að öðru hvoru lendi deildir í vanda en afar óheppilegt er þegar það gerist ítrekað. Það er einlæg og von og trú aðalstjórnar að með öflugum fólki í brúnni takist að rétta af slagsíðu í rekstri.

### **Fjölnota knattspyrnuhús**

Formaður hugðist flytja nákvæmlega sama pistil og á síðasta aðalfundi um þetta málefni þar sem fátt verulega markvert hafði gerst síðasta ár. Pistillinn var svohljóðandi; Eitt mikilvægasta hagsmunamál íþróttahreyfingarinnar í Ísafjarðarbæ er og hefur verið bætt aðstaða knattspyrnumanna. Um nokkurt skeið hefur verið stefnt að byggingu knattspyrnuhúss sem mun gjörbreyta aðstöðu knattspyrnumanna til hins betra. Hafa ber í huga að fleiri íþróttagreinar koma til með að njóta góðs af þessari uppbyggingu því fótbolti hefur notað u.þ.b. 33% af tiltækum tímum í íþróttahúsunum á Torfnesi og í Bolungarvík. Þar sem eftirspurn eftir tímum er langt umfram framboð munu aðrar íþróttagreinar bera meiri tíma úr bítum með tilkomu nýs húss.

Um hið væntanlega hús væri hægt að fjalla um í löngu máli og sýnist sitt hverjum. Hvernig hús, hvaða stærð, hæð þess, staðsetning og kostnaður. Ekki er ástæða til að fjölyrða um það hér, heldur fagna því að nú hyllir í að löngu tímabær uppbygging hefjist á Torfnesi.

Þannig hljóðaði pistill síðasta árs. Nú ber svo hinsvegar við, að hreyfing virðist komin á málið, þó ekkert sé naglfast. Í gær fól bæjarráð bæjarstjóra að skrifa undir viljayfirlýsingu við fyrirtæki um byggingu knattspyrnuhúss. Því ber sannarlega að fagna sem stórum áfanga í langri sögu. Um það hvort nú sé virkilega rétti tíminn til slíkra framkvæmda segi ég aðeins, að furðulegt nokk virðist stundum aldrei vera rétti tíminn til tiltekinna framkvæmda. Hvað sem tíminn leiðir í ljós kýs ég að treysta kjörnum bæjarfulltrúum bæði fyrir fjárhag og framkvæmdum Ísafjarðarbæjar.

## **Siðamál**

Í kjölfar viljayfirlýsingar Bæjarstjórnar Ísafjarðarbæjar þess efnis að fjárveitingar til íþróttafélaga verði m.a. skilyrt því að félögin setji sér siðareglur og viðbragðsáætlanir fór fram mikil vinna í mótun slíkra reglna fyrir Vestra. Voru þær samþykktar á síðasta aðalfundi og eru nú aðgengilegar á íslensku og ensku á heimasíðu Vestra.

## **Starf deilda**

Starf deilda var með blómlegum hætti að undanskilinni sunddeild en starf hennar hefur verið í lágmarki um nokkurt skeið. Deildin hefur þó staðið fyrir sundæfingum í íþróttaskóla HSV. Fjölmargir iðkendur hafa náð þrýðilegum árangri og sumir verið valdir í landsliðsverkefni. Ef stiklað er á stóru má nefna að blaklið karla keppti í efstu deild og var meistaraflokkur karla í körfu á miklu skriði og kominn í úrslitakeppni þegar keppni var stöðvuð nú í vetur. Í knattspyrnu komst karlalið Vestra upp í fyrstu deild og verður sumarið óneitanlega krefjandi og spennandi. Í yngri flokkum deilda var haldið úti kröftugu starfi og keppni. Þess skal einnig getið að blakmaðurinn Mateusz Klóska var kjörinn íþróttamaður Ísafjarðarbæjar og Bolungarvíkur.

Um starf deildanna vísast að öðru leyti í starfsskýrslur þeirra sem finna má á heimasíðu Vestra.

## **Kófið**

Þó starfsskýrsla þessi fjalli um árið 2019 er ómögulegt að horfa framhjá því ástandi sem varað hefur nú í byrjun árs. Heimsfaraldur hafði gríðarleg og víðtæk áhrif á líf og heilsu fólks sem eðli málsins samkvæmt teygði sig einnig inni íþróttastarfið. Ekki skal tíundað hér með nákvæmum hætti áhrif faraldursins á starfsemi deilda en áhrifin voru mismikil. Æfingar voru stöðvaðar, keppnir í körfu og blaki einnig. Ljóst er að áhrif covid munu verða nokkur á fjárhag deilda, styrktaraðilar halda að sér höndum eða ganga jafnvel úr skaftinu og skipulag og framkvæmd viðburða og fjáraflana riðlast.

Ríkisstjórn Íslands fól ÍSí að útfæra útdelingu 450 milljóna til íþróttahreyfingarinnar til að bæta það tjón sem einingar innan hennar urðu fyrir. Ákveðið var að skipta aðgerðum í tvo hluta; almennar aðgerðir, 300 milljónir og sértækar aðgerðir, 150 milljónir. ÍSí úthlutaði félögum eftir reiknireglu sem miðaði við fjölda skráðra iðkenda á aldursbilinu 6-18 ára árið 2019 og tóku einnig tillit til fjölgreinafélaga sem báru meira úr býtum. Sértæku aðgerðirnar, 150 milljónir, miða að því að bæta félögum tekjutap vegna einstakra viðburða eða móta og þarf að sækja sérstaklega um á heimasíðu ÍSí. Eru deildir hvattar til að kynna sér þær aðgerðir og ganga úr skugga um hvort tjón þeirra uppfylli sett skilyrði. Formaður hyggst undir liðnum önnur mál kynna niðurstöðu aðalstjórnar um skiptingu þessara fjármuna.

## **Að lokum**

Í dag gengur úr aðalstjórn Vestra, Sigurður Jón Hreinsson sem verið hefur ritari stjórnar frá stofnun félagsins. Sigurður vann einnig ötullega í undirbúningsnefnd fyrir stofnun Vestra sem starfaði í á annað ár að stofnun félagsins. Sigurður hefur nú verið kjörinn formaður blakdeildar og því tilhlýðilegt að víkja úr aðalstjórn. Honum þakka ég gott samstarf undangengin ár en einnig þakka ég öðru stjórnarfólki og deildum fyrir ánægjulegt samstarf. Formaður aðalstjórnar Vestra er

samkvæmt lögum félagsins kjörinn til eins árs í senn. Sá er hér stendur gefur ekki kost á sér til áframhaldandi setu formaður aðalstjórnar Vestra og þakkar samstarf liðinna ára.

#### **5. Lagðir fram endurskoðaðir ársreikningar félagsins.**

Guðni Guðnason gjaldkeri Vestra, lagði fram endurskoðaða ársreikninga sem samþykktir hafa verið af skoðunarmönnum félagsins. Hann fór yfir helstu lykiltölur í rekstri félagsins, en heildarvelta félagsins með öllum deildum var rúmar 115 milljónir króna á síðasta ári. Reikningarnir lágu frammi fyrir fundarmönnum til skoðunar bæði sem útprentuð eintök auk þess sem fundarmönnum var vísað á vefslóð inni á heimasíðu félagsins. Fundarstjóri opnaði fyrir umræður um þá að lokinni yfirferð gjaldkera. Nokkrar umræður urðu um reikningana en að þeim loknum bar fundarstjóri þá upp til samþykktar og voru þeir samþykktir í einu hljóði.

#### **6. Ákvörðun félagsgjalds.**

Á síðasta aðalfundi var ákveðið að árlegt félagsgjald yrði 2.000. kr. Guðni Guðnason, gjaldkeri félagsins, bar fram tillögu að það yrði óbreytt. Undirbúningur fyrir þessa fjáröflunarleið er orðinn allnokkur og ætlunin hafi verið að koma þessu út fyrir nokkru síðan en vænta má þess að rukkun bærust félagsmönnum á næstu vikum. Ítrekaði gjaldkeri að horft væri til eldri skráða félaga en það væru um 800 félagar, iðkendur væru sjálfkrafa félagar og ekki innheimt gjald af þeim.

#### **7. Fjárhagsáætlun lögð fram til samþykktar.**

Fundarstjóri gaf Guðna Guðnasyni gjaldkera orðið. Hann fór yfir helstu tölur í fjárhagsáætlun líðandi árs og fundarstjóri opnaði síðan fyrir umræður. Tillagan borin upp til atkvæða og samþykkt.

#### **8. Lagabreytingar.**

Fundarstjóri upplýsti að engar tillögur um lagabreytingar hafi borist fyrir aðalfund.

#### **9. Kosningar.**

a) Kosinn formaður. Tillaga um Guðfinna Hreiðarsdóttir. Engar aðrar tillögur bornar fram, samþykkt með lófataki.

b) Kosnir þrír stjórnarmenn til tveggja ára í senn. Guðni Guðnason, Gísli Jón Hjaltason og Sólrún Geirsdóttir eru núna að ljúka tveggja ára kjörtímabili. Tillaga um að þau verði öll endurkjörin. Engar aðrar tillögur bornar fram, samþykkt með lófataki.

c) Kosnir tveir varamenn til eins árs í senn. Tillaga um Jónas Gunnlaugsson og Þorstein Þráinsson. Engar aðrar tillögur bornar fram, samþykkt með lófataki.

c1) Kosnir tveir stjórnarmenn til eins árs, í stað Sigurðar Jóns Hreinssonar sem vikur úr aðalstjórn sökum þess að hann er nýkjörinn formaður blakdeildar Vestra og Guðfinna Hreiðarsdóttir sem nú er nýkjörinn formaður Vestra. Tillaga um Hlyn Reynirsson og Hjalta Karlsson. Engar aðrar tillögur bornar fram, samþykkt með lófataki.

d) Kosnir tveir skoðunarmenn reikninga og einn til vara. Tillaga um Ingimar Halldórsson, Ásdísi Birnu Pálsdóttur og Gísla Úlfarsson til vara. Engar aðrar tillögur bornar fram, samþykkt með lófataki.

e) Kosning fastra nefnda er aðalfundur ákveður. Engar tillögur um fastar nefndir liggja fyrir fundinum.

Fyrir var í stjórn og situr til eins árs til viðbótar: Jóna Lind Kristjánsdóttir.

#### **10. Önnur mál.**

Hjalti Karlsson greinir fundinum frá ákvörðun stjórnar um hvernig fjármagni frá ÍSÍ skildi skipt á milli deilda, en Íþróttafélagið Vestri fékk í sinn hlut rúmar 3,2 milljónir króna og byggja þær tölur á iðkenda fjölda félagsins frá síðasta ári. Í útdeilingu ÍSÍ var notast við iðkenda tölur sem ma. byggja á iðkenda tölum Sunddeildar sem sannarlega er ekki með starfsemi núna og verður því ekki fyrir fjárhagstjóni vegna faraldursins. Stjórn Vestra leggur því til að vægi fjölda iðkenda undir 18 ára annarsvegar og yfir 18 ára hinsvegar verði lagt til grundvallar útreikningum á skiptingunni og að upphæðin skiptist á milli þeirra þriggja deilda sem sannarlega störfuðu: Knattspyrnudeild 1.594.033.- kr. Körfuknattleiksdeild 942.437.- kr. Blakdeild 719.200.- kr.

Guðný Stefanía Stefánsdóttir lýsti ánægju með að það sé að hylla undir byggingu á knattspyrnuhúsi.

Hjalti Karlsson kynnti fyrir fundarmönnum að finna mætti inni á heimasíðu Vestra skjöl sem innihalda gildi og siðareglur Vestra. Skjölin má finna bæði á íslensku og ensku.

#### **11. Fundarslit.**

Fundarstjóri bar upp tillögu um að fundarstjóra og ritara yrði farið að ganga frá fundargerð sem síðan yrði birt á vefsíðu Vestra. Samþykkt samhljóða.

Fundarstjóri gaf þá nýkjörnum formanni, Guðfinnu Hreiðarsdóttur orðið og fól henni stjórn fundarins. Guðfinna þakkaði fundarmönnum það traust sem henni væri sýnt með kjörinu og færði síðan fyrrverandi formanni, Hjalta Karlssyni, sem og Sigurði Hreinssyni, fráfarandi ritara, þakkir fyrir þeirra störf í þágu félagsins. Færði hún þeim blómvendi sem þakklætisvott, fyrir hönd félagsmanna.

Þá þakkaði Guðfinna fundarmönnum fyrir komuna, ágæta mætingu og góðar umræður. Að því búnu lýsti formaður því yfir að fundi væri slitið kl. 20:44.